

## 每週經課朗誦經文(巴克禮漢羅/教羅)2013/09/22

### 共同經課 - 1 耶利米書八章十八節~九章一節

18 我有憂悶，情願能得安慰；我 ê 心暈去。19 看 ah，我 ê 百姓哀傷 ê 聲，tùi 遠遠 ê 所在來，講，耶和華無 tī 錫安 mah？伊 ê 王無 tī hit 內面 mah？In 啥事用雕刻 ê 偶像，kap 外邦虛假 ê，來激我 ê 受氣 ah？20 收成 ê 時已經過，夏天 ê 日已經盡；阮 iáu 無得 tiòh 救。21 因為我 ê 百姓 ê 毀傷，我亦受毀傷；我盡在哀傷，驚惶擒 tiâu 我。22 Tī Ki-liát kiám 無乳香？tī-hia kiám 無醫生？我 ê 百姓怎樣 boē 得 tiòh 醫好？1 願我 ê 頭殼做水泉，我 ê 目矙做目屎 ê 源頭；我 thang 為我 ê 百姓中受 thài ê 人，日暝啼哭。

### 共同經課 - 2 詩篇七十九篇一節~九節

1 A-sat ê 詩。1) 上帝 ah，外邦人進入你 ê 產業，Phah lâ-sâm 你 ê 聖殿，Hō 耶路撒冷變-成土堆。2 In 將你 ê 奴僕 ê 身屍，交 hō 空中 ê 飛鳥，做食物；將你聖 ê 百姓 ê 肉，交 hō 地上 ê 野獸。3 Tī 耶路撒冷周圍，流 in ê 血親像水；亦無人埋葬伊。4 阮 hō 阮隔壁 kok 所凌辱，Hō 阮四圍 ê 人冷笑譏刺。5 耶和華 ah，你 ê 受氣 beh joā 久，到永遠 mah？你 ê 受氣 beh 親像火 tòh mah？6 願你將你 ê 受氣 pià" 落 tī hiah-ê m-bat 你 ê 外邦，以及 hiah-ê 無求叫你 ê 名 ê 列國。7 因為 in 吞食雅各，Hō 伊 khiā 起 ê 所在拋荒。8 求你 m-thang 記得阮 ê 祖公 ê 罪，來 tùi 阮討；願你 ê 慈悲緊緊臨到阮；因為阮落到極卑微 ê 地位。9 救阮 ê 上帝 ah，求你因為你 ê 名 ê 榮光幫贊阮；因為你 ê 名 ê 緣故救阮，赦免阮 ê 罪。

### 共同經課 - 2 詩篇四篇

1 大衛 ê 詩，交 hō 樂官；用絲絃 ê 樂器。1) 顯明我 ê 義 ê 上帝 ah，我求叫 ê 時，求你應我。我 tī 困苦 ê 中間，你 bat hō 我寬闊。Ta" 求你憐憫我，來聽我 ê 祈禱。2 Lín chiah-ê 上等人 ah，將我 ê 榮光變做凌辱，beh 到 tī 時？Lín 意愛空虛，chhiau-chhē 無影跡，beh 到 tī 時？[Sè-láh] 3 Lín tiòh 知耶和華已經分別敬虔 ê 人做伊家己 ê。我求叫耶和華，伊 beh 聽我。4 Lín tiòh 驚惶，m-thang 犯罪；Tī 眠床裡，心 tiòh 三思，亦 tiòh 肅靜。[Sè-láh] 5 Tiòh 獻義 ê 祭，亦 tiòh oá 靠耶和華。6 Choē-choē 人講，Chī-chūi 會指示阮甚麼好處？耶和華 ah，求你用你 ê 面 ê 光來照阮。7 你 hō 我心內有歡喜，贏過人得 tiòh choē-choē 五穀 kap 新酒 ê 時。8 我 beh 安然倒 teh 暈，因為只有耶和華你 hō 我安穩 khiā 起。

### 共同經課 - 3 提摩太前書二章一節~七節

1 所以我所勸勉 ê，第一就是替眾人懇求、祈禱、求恩、祝謝；2 替 chiah-ê 王 kap lóng 總 ê 官府求；hō 咱凡事敬虔端莊，thang 安然恬靜來過日。3 這是好，koh 得 tiòh 接納 tī 救咱 ê 上帝 ê 面前；4 伊 ài 眾人得 tiòh 救，也深知真理。5 因為上帝是一個，上帝 kap 人 ê 中間中保也是一個，就是做人 ê 基督耶穌；6 伊為 tiòh 眾人獻本身，做替贖 ê 價錢，有及時證明；7 因為 án-ni，我受設立做宣傳 ê，做使徒，用信用真實做外邦 ê 教師；我所講是真實無白賊。

### 共同經課 - 4 路加福音十六章一節~十三節

1 耶穌 koh 對學生講，某個好額人有一個管家 ê；有人將伊破費主人 ê 業對伊 ê 主人告伊。2 主人叫伊來 kā 伊講，我所聽見你 chit-ê t'ai-chì 是怎樣？Ta" 你管家 ê 事 tiòh kap 我清楚，因為你 boē 能猶原做管家。3 管家 ê 心內想講，主人 lut 我管家 ê 職，我 beh 怎樣 ah？kiáh 鋤頭無氣力，做乞食 mī 見笑。4 Ta" 我知所 tiòh 做 lah，到 lut 管家 ê 職，hit 時人 chiah beh 接納我入 in ê 家。5 伊就叫欠伊主人 ê 債 ê，一個一個來；kā 頭一個講，你欠我 ê 主人 joā choē？6 應講，油，一百桶。就 kā 伊講，Théh 你 ê 賬，緊緊坐，寫五十。7 Koh kā 別 ê 講，你欠 joā choē？伊講，麥，一百石。kā 伊講，Théh 你 ê 賬，寫八十。8 主人就 o-ló chit-ê 不義 ê 管家，為 tiòh 伊所做有知識；因為 chit 世間 ê 人為 tiòh 世情來圖謀，比光明 ê 人 khah 有知識。9 我也 kā lín 講，tiòh 用不義 ê 錢財結交朋友，到錢財了去 ê 時，in chiah beh 接納 lín 入永遠 ê 帳房。10 Tī 至 sió-khoá ê 事盡忠 ê，tī 大 ê 也盡忠；tī 至 sió-khoá ê 事不義 ê，tī 大 ê 也不義。11 Tī 不義 ê 錢財 lín 若無盡忠，chī-chūi beh 用真 ê 託重 lín？12 Koh tī 屬別人 ê，lín 若無盡忠，chī-chūi beh 用屬 lín ê hō lín ah？13 一個奴僕 boē 能服事兩個主人；因為伊會怨恨 chit-ê，疼 hit-ê；á 是會對重 chit-ê，看輕 hit-ê；lín boē 能服事上帝續服事錢財。